

10. november 2015

**Sumiiffinni nunami aalajangersimasuni nunaminertanik atuinissamut akuersissuteqarluni takornariartitsisarneq Inatsisartut inatsisaannik nr. 19, 3. december 2012-meersumik tunngaveqartoq pillugu apeqquteqaat aallaavigalugu Inatsisartut oqallinnissaannik siunnersuut.**

(Inatsisartunut ilaasortaq Vivian Motzfeldt Siumut)

Siumumiit aalajangiiffigisassatut siunnersuummut imaattumik oqaaseqaateqassaagut:

Siumumiit ilisimavarput nunatta sumiiffiit ilaanni takornariartitsinermik suliniuteqartartut avataaniit, allamiunit pigineqartut, aasaanerani takornariartitsinermi suliarlorlutik nunatsinnukartarmata aamma nunatsinni atuisarneri malunnaatilimmik annertusiartortut takusinnaavarput.

Ilaatigut maluginiarneqartarput takornarialerisut allameersut nunaminniit nunatsinnut nerisassanik tikisitsillutik takornarissat nunatsinnukartussat nerisaqarnissaat qulakkeerneqartartoq, taamaasilluni niuertarfiit nioqquteqarnermikkut takornarissat annerusumik iluaqutiginnitsoortarpaat.

Nunatsinni takornariaqarneq annertunerusumik piorsaavigineqarnissaa Siumumiit anguniagaraarput, taamaattumik pissusissamisoorpoq, soorlu siunnersuuteqartup tunngavilersuutiminik oqaatigigaa, piginnittuuneq akisussaaqataanerlu nunaqavissunik atortinneqarnissaat sapinngisamik qularnaarneqartariaqartut.

Pisariaqarpoq nunatsinni takornariaqarnerup annertusaavigineqarnera ilutigalugu aningaasarsior-nikkut nunatsinni sumiiffinni takornariartitsiviusuni ineriartortitsinissamut iluaqutaasumik sunniuteqarluni ingerlatsiviunissaa, taamaaliornikkut sumiiffinni peqataatitsineq kajumissaataalluni sulerusunermik pilersitsiviussammata.

Ullumikkut qajarissat atorlugit takornariartitsinerit annertusiartortutut ipput, taakkulu sumiiffinniit sumiiffinnut unnuisarlutik ingerlaartarput taamaaliorniaraanilu nunaminertanik atuisinnaanissamut akuersissummik peqartussaapput.

Nunaminertamik atuisinnaanerup qularnaangilaa nunatsinni aningasarsiornikkut pissarsiaqarfiusumik ingerlatsisoqarnisaat.

Ajornartorsiutit aaqqiivigineqarnissaat Siumumiit pingaartillugit alloriarfiusariaqartut isumaqarpugut. Nunatsinni takornariaqarneq tassaasariaqarpoq nunatsinnut innuttaasunullu aningaasarsiornikkut iluaqusiiisoq minnerunngitsumillu takornariartitsinermik ineriartortitsiviusoq.

Aporfiit takusinnaasagut aaqqiiviginissaat pingaaruteqarput taamaaliornikkut Nunarput nammineq napatikkiartortup tunngaviit pitsaanerpaasorisatsinnik aqutissiutissagatsigu.

Nunatsinni takornariartitsineq annertusarnissaanut suliniutissat arlaqarput, takornarissat pitsaasunik atugaqarsimallutik misigisaqarsimallutillu nunaminnut utertarnissaat pingaaruteqarmata.

Oqaluttuareqqiineramik kultureqarnitta takutippaa misigisimasat pillugit inuit akornanni oqallinnerit tassaammata nittarsaassinerit pitsaanerpaat, tamaattumik pingaaruteqarpoq aporaaffiusinnaasut takornarialerisut innuttaasullu akornanni sapinngisamik paaseqatigiiffiusumik ingerlatsiviginissaat, tassaniipporlu pineqartumi ajornartorsiummik aaqqiinissamik ujartuinissamut pisussaaffik, taamaasilluni suleqatigiinneq ineriartorfiusoq pilersinneqassammat.

Niuernikkut pitsaasumik tamanut pissarsiaqarfiusumik ingerlatsinissaq pingaaruteqarpoq, tamanalu sapinngisamik anguniassallugu pisussaaffeqarpugut, aamma nunaqavissunut.

Taamaattumik pisariaqarpoq nunatsinni innuttaasut, nunattalu ingerlanneqarnera isigalugu pitsaasumik imaqarluartumik ataqqinnittumillu ingerlatsinissarput, tamannalu angussagutsigit atukkatigut pitsaasunik sinaakkusersimasariaqarparput.

Inuiaqatigiinni allaneersuniit aallaqqittussaniillu allaassutigaarput suliassatta ilagimmagu nuna tummaarisarput ineriartortissallugu pisussaaffeqaratta, soorluttaaq inuiaqatigiit namminiileriartortut pitsaasunik tungavississallugit pisussaaffeqartugut.

Taamatut Siumumiit oqaaseqarluta siunnersuuteqartoq Vivian Motzfeldt, Siumut, oqallisissiatut siunnersuutaa taperserparput.

Suka K.Frederiksen

Siumut